

Na osnovu člana 13., člana 52. i člana 64. Zakon o cestama Federacije BiH ("Službene novine Federacije BiH", broj 12/10, 16/10 - ispravka i 66/13), člana 8 i člana 13. Zakona o principima lokalne samouprave u Federaciji BiH ("Službene novine Federacije BiH", broj 49/06 i 51/09), te člana 10., člana 25. i člana 70. Statuta Općine Stari Grad Sarajevo - Prečišćeni tekst ("Službene novine Kantona Sarajevo", broj 20/13), Općinsko vijeće Stari Grad Sarajevo na 7. sjednici, održanoj dana 29.07.2021. godine, donijelo je

ODLUKU

o prokopavanju saobraćajnica čiji je upravitelj Općina Stari Grad Sarajevo

I – OPĆE ODREDBE

Član 1.

Ovom Odlukom uređuju se posebni uslovi i način organizovanja poslova, vrsta radova, te plaćanje naknade za prokopavanje saobraćajnica čiji je upravitelj Općina Stari Grad Sarajevo (u daljem tekstu: Općina), kao i njihovo dovođenje u prvobitno i tehnički ispravno stanje.

Član 2.

Pod prokopavanjem saobraćajnica (u daljem tekstu: prokopavanje) u smislu odredaba ove Odluke podrazumijeva se svaki zahvat u cestovnom i zaštitnom cestovnom pojasu, a koji se vrši radi polaganja novih, zamjene, opravke ili uklanjanja postojećih podzemnih instalacija (vodovodni, kanalizacioni, gasni, toplovodni, elektro, telefonski, optički i drugi objekti), kao i površinskih, te nadzemnih instalacija koje zahtjevaju zahvate u tlu.

Član 3.

Saobraćajne površine čiji je nadležni upravitelj ceste Općina čine:

- lokalne ceste,
- nerazvrstane ceste i
- trotoari uz glavne gradske ceste/ulice: Obala Kulina bana, Telali, Mula Mustafe Bašeskije, Hamdije Kreševljakovića i Bistrik.

Član 4.

Lokalne ceste kojim upravlja Općina utvrđene su u članu 6. Odluke o razvrstavanju lokalnih cesta i ulica u gradu Sarajevu na području Općine Centar Sarajevo, Novi Grad Sarajevo, Novo Sarajevo i Stari Grad Sarajevo ("Službene novine Kantona Sarajevo", broj 40/14).

Nerazvrstana cesta je svaka površina koja se koristi za saobraćaj po bilo kojoj osnovi i koja je pristupačna većem broju korisnika. Nerazvrstana cesta kojom upravlja Općina, smatra se svaka ulica na njenoj teritoriji koja u smislu odredbi Zakona o cestama Federacije BiH ("Službene novine Federacije BiH", broj 12/10, 16/10 - ispravka i 66/13) nije kategorisana kao javna cesta.

II – USLOVI I POSTUPAK PROKOPAVANJA

Član 5.

Prokopavanje se vrši na osnovu odobrenja općinske službe za upravu nadležne za poslove iz komunalne oblasti (u daljem tekstu: općinska služba).

Odobrenje za prokopavanje može se izdati samo vlasniku podzemnih instalacija.

Vlasnik instalacija za potrebe izvođenje radova na prokopavanju može putem ugovora angažovati registrovano i specijalizovano pravno lice da u njegovo ime i i za njegov račun izvede potrebne radove.

Član 6.

Radovi na prokopavanju dozvoljeni su u periodu od 1. aprila do 1. novembra tekuće godine.

Izuzetno od odredbe prethodnog stava, a u cilju hitnih opravki na podzemnim instalacijama, prokopavanje se može vršiti tokom cijele godine na osnovu polugodišnjeg odobrenja kojeg izdaje općinska služba.

Član 7.

Vlasnik podzemnih instalacija je obavezan da vodi evidenciju svih prokopa koji predstavljaju hitnu intervenciju, te je istu dužan dostavljati općinskoj službi.

Član 8.

O svakoj hitnoj intervenciji radi otklanjanja kvarova, vlasnik podzemnih instalacija je dužan da odmah obavijesti općinsku službu za upravu nadležnu za inspeksijske poslove (u daljem tekstu: općinska inspekcija), a najkasnije u roku od 24 sata ili narednog radnog dana, računajući od momenta saznanja za kvar, te da navede razloge iz kojih se nedvojbeno cijeni da je u svakom konkretnom slučaju hitnost u postupanju bila opravdana.

Vlasnik podzemnih instalacija u svakom konkretnom slučaju, a po pribavljenom odobrenju za prokop koji nije hitna intervencija, je dužan da u roku od 24 sata prije početka samih radova, obavijesti općinsku inspekciju i Ministarstvo unutrašnjih poslova Kantona Sarajevo.

Član 9.

Odobrenje o prokopu radi hitnih intervencija za naredni polugodišnji period, vlasniku podzemnih instalacija će se produžiti, samo ukoliko su sve prokopane površine u prethodnom polugodišnjem periodu dovedene u prvobitno i tehnički ispravno stanje, a što se dokazuje pismenim izvještajem općinske inspekcije.

Član 10.

Prokopavanje i dovođenje prokopanih saobraćajnica u prvobitno i tehnički ispravno stanje vrši se na način i pod uslovima propisanim u Tehničkim uslovima za prokopavanje i zatvaranje prokopanih javnih površina na području Kantona Sarajevo ("Službene novine Kantona Sarajevo", broj 10/09).

Član 11.

U slučaju da se radovi na prokopavanju otpočnu izvoditi bez potrebnog odobrenja, postupajući cestovni, odnosno komunalni inspektor, svaki u okvirima svoje nadležnosti, rješenjem će naložiti da se započeti radovi obustave, te će se odrediti rok za pribavljanje odobrenja, koji ne može biti duži od 8 dana.

Ukoliko vlasnik podzemnih instalacija ne obustavi radove na prokopavanju i u ostavljenom roku ne pribavi potrebno odobrenje, postupajući inspektor rješenjem će naložiti da prokopanu površinu vrati u prvobitno i tehnički ispravno stanje.

Član 12.

Kada inspektor u vršenju redovnog inspekcijskog nadzora, neposrednim opažanjem uoči oštećenja na saobraćajnoj površini uzrokovana kvarom na tačno određenim podzemnim instalacijama, rješenjem će naložiti vlasniku tih instalacija da najkasnije u roku od 2 dana, računajući od dana prijema rješenja, pristupi radovima na otklanjanju kvara.

Član 13.

Ukoliko radovi na prokopavanju zahtijevaju povremene obustave ili izmjenu režima saobraćaja, po dobivanju odobrenja za prokop od strane općinske službe, a prije samog početka izvođenja radova, potrebno je pribaviti i odobrenje za izmjenu režima saobraćaja od strane Ministarstva saobraćaja Kantona Sarajevo.

Član 14.

Prilikom radova prokopavanja, izvođač je dužan izvršiti sve propisane mjere zaštite na radu i odgovarajuće mjere zaštite prolaznika i ostalih učesnika u saobraćaju, te postaviti odgovarajuću saobraćajnu signalizaciju na način da se ne ometa i ugrožava javni saobraćaj.

Član 15.

Prilikom izvođenja radova na prokopavanju potrebno je na tehnički adekvatan način zaštititi postojeće instalacije, a sve eventualne štete na istima, vlasnik podzemnih instalacija je dužan nadoknaditi o vlastitom trošku.

Kada se usljed izvođenja radova ošteti saobraćajna površina koja nije bila obuhvaćena odobrenjem o prokopu, njeno dovođenje u prvobitno i tehnički ispravno stanje vrši se pod istim uslovima i na način propisan za površinu koja je bila predmetom prokopavanja.

Član 16.

Oštećenja na stambenim, poslovnim i drugim objektima, te saobraćajnim površinama, nastala usljed radova prokopavanja, vlasnik podzemnih instalacija je dužan da sanira o vlastitom trošku.

O nastalim oštećenjima iz stava 1. ovog člana, vlasnik podzemnih instalacija je dužan da odmah, a najkasnije narednog dana, obavijesti općinsku inspekciju i vlasnika objekta.

Član 17.

Izgrađene, rekonstruisane i sanirane saobraćajne površine ne mogu biti predmetom prokopavanja prije isteka perioda od 2 godine, računajući od dana završetka radova, osim u slijedećim slučajevima:

- u slučaju kvara ili dejstva vanredne situacije, kada je neophodno otkloniti posljedice koje predstavljaju potencijalnu opasnost po život i zdravlje ljudi, materijalna dobra i bezbjednost saobraćaja,
- ukoliko vlasnik podzemnih instalacija prihvati obavezu da izvrši sveobuhvatnu sanaciju saobraćajne površine koja je bila predmetom prokopavanja, u njoj cijeloj dužini i širini i
- kada prokopavanje podrazumijeva radove manjeg obima, te ukoliko se istovremeno za njihovo izvođenje može utvrditi postojanje javnog interesa.

Član 18.

Za izvedene radove na dovođenju prokopane saobraćajne površine u prvobitno i tehnički ispravno stanje, vlasnik podzemnih instalacija garantuje 2 godine.

Pod garancijom se podrazumijeva obaveza vlasnika podzemnih instalacija, da po pismeno upućenom pozivu općinske službe, o svome trošku, otkloni sve nedostatke koje su posljedica loše izvedene sanacije na prokopanoj saobraćajnoj površini.

Nadzor nad izvršavanjem obaveze iz stava 2. ovog člana vrše općinska služba i općinska inspekcija, svaka u okvirima svoje nadležnosti.

III - NAKNADA

Član 19.

Za prokopavanje saobraćajnica kojim upravlja Općina, vlasnik podzemnih instalacija je dužan plaćati naknadu.

Naknada za prokopavanje se utvrđuje posebnim rješenjem koje donosi općinska služba, a obračunava se u bruto iznosu koji uključuje neto iznos sa obračunatim iznosom PDV-a.

Protiv upravnih akata kojim se utvrđuje naknada za prokopavanje saobraćajnica, u drugom stepenu rješava nadležni općinski organ utvrđen aktima Općine.

Član 20.

Naknada za prokopavanje saobraćajnica čiji je upravitelj Općina utvrđuje se u iznosu od 50,00 KM po m² prokopane površine, s tim što minimalna naknada za prokop po izdatom odobrenju ne može biti manja od 200,00 KM.

Naknada za prokopavanje se plaća u cijelom iznosu, prije preuzimanja rješenja.

Član 21.

Prihodi ostvareni po osnovu naplate za prokopavanje, usmjeravat će se za izgradnju i poboljšanje cestovne infrastrukture na području Općine.

Član 22.

Naknada se neće naplaćivati u slučajevima kada se prokopavanje vrši radi hitnih intervencija na opravci i otklanjanju kvarova na postojećim podzemnim instalacijama, kao i u slučajevima, finansiranja radova na prokopavanju iz budžetskih sredstava, od strane Općine u svojstvu investitora.

IV – NADZOR

Član 23.

Nadzor nad primjenom ove Odluke vrši općinska služba.

Nadzor nad prokopavanjem i dovođenjem prokopanih saobraćajnih površina u prvobitno i tehnički ispravno stanje vrši općinska inspekcija.

Član 24.

Poslove inspeksijskog nadzora nad sprovođenjem ove Odluke, vrši općinska inspekcija putem cestovnog i komunalnog inspektora.

Protiv upravnih akata cestovnog i komunalnog inspektora donesenih na osnovu odredaba ove Odluke, može se izjaviti žalba organu koji je aktima Općine utvrđen da rješava u drugom stepenu, i to, u roku od 8 dana od dana prijema rješenja.

Žalba izjavljena na rješenje nadležnog inspektora, ne odlaže izvršenje rješenja.

U vršenju inspeksijskog nadzora, cestovni i komunalni inspektor, u okvirima svoje nadležnosti, ovlašten je za pokretanje prekršajnog postupka protiv počinioca prekršaja, u slučajevima kada se prokopavanje saobraćajnica ne vrši u skladu sa odredbama ove Odluke.

V – KAZNENE ODREDBE

Član 25.

Novčanom kaznom od 5.000,00 KM do 7.000,00 KM, kaznit će se za prekršaj pravno lice – vlasnik podzemnih instalacija, ako:

- vrši prokopavanje bez odobrenja općinske službe (član 5. ove Odluke),
- u roku od 24 sata ne obavijesti općinsku inspekciju (član 8. ove Odluke),
- se ne pridržava "Tehničkih uslova za prokopavanje i zatvaranje prokopanih javnih površina na području Kantona Sarajevo" i prokopane saobraćajne površine ne dovede u prvobitno i tehnički ispravno stanje (član 10. ove Odluke),
- nastavi sa izvođenjem radova nakon donošenja rješenja o njihovom obustavljanju (član 11. ove Odluke),
- oštećenu saobraćajnu površinu nakon prokopavanja ne dovede u prvobitno i tehnički ispravno stanje (član 15. stav 2. ove Odluke),
- ne preduzme mjere radi otklanjanja neposredne opasnosti po život i zdravlje ljudi, te za susjedne objekte i bezbjednost saobraćaja.

Za prekršaj iz stava 1. ovog člana, kaznit će se odgovorno lice u pravnom licu novčanom kaznom u iznosu od 1.000,00 KM do 2.000,00 KM.

Član 26.

Novčanom kaznom od 5.000,00 KM do 7.000,00 KM, kaznit će se za prekršaj pravno lice – izvođač radova, ako:

- se ne pridržava "Tehničkih uslova za prokopavanje i zatvaranje prokopanih javnih površina na području Kantona Sarajevo" i prokopane saobraćajne površine ne dovede u prvobitno i tehnički ispravno stanje (član 10. ove Odluke),
- ne pribavi odobrenje za izmjenu režima saobraćaja od strane Ministarstva saobraćaja Kantona Sarajevo (član 13. ove Odluke),
- ne preduzme odgovarajuće mjere zaštite prolaznika i ostalih učesnika u saobraćaju, te ne postavi saobraćajnu signalizaciju (član 14. ove Odluke),
- ne preduzme mjere radi otklanjanja neposredne opasnosti po život i zdravlje ljudi, te za susjedne objekte i bezbjednost saobraćaja.

Za prekršaj iz stava 1. ovog člana, kaznit će se odgovorno lice u pravnom licu novčanom kaznom u iznosu od 1.000,00 KM do 2.000,00 KM.

Član 27.

Novčanom kaznom u iznosu od 500,00 KM do 1.000,00 KM, kaznit će se fizičko lice – građanin koji vrši prokopavanje saobraćajnica.

VI – ZAVRŠNE ODREDBE

Član 28.

Na odnose koji nisu regulisani odredbama ove Odluke, primjenjuju se važeći propisi u Kantonu Sarajevo kojima se uređuje oblast prokopavanja javnih površina.

Član 29.

Ova Odluka stupa na snagu danom objavljivanja na oglasnoj ploči Općine, a naknadno će biti objavljena u "Službenim novinama Kantona Sarajevo".

Broj: 02-45-500/21
Sarajevo, jula 2021. godine

**PREDSJEDAVAJUĆI OPĆINSKOG VIJEĆA
STARI GRAD SARAJEVO**

dr.sc. Mirza Batalović, dipl.el.ing.